

DENTRI LA INOVAZION

Bielzà tal 1474, la Republiche di Vignesie e veve individuât il concet

## Brevets, une storie che e ven di lontan

Par tancj agns i brevets a son stâts une cuistion che a fevelavin dome che ai adets ai lavôrs: imprenditôrs, inventôrs, consulents di brevets, juriscj. Intai ultins timps, complice la globalizazion e la crisi economiche, il teme al è diventât di interès difondût e il brevet al è un cognossût fatôr di competitivitât, sperance pe ripiade economiche, valôr zontât pe imprese.

Ma nol è un strument modern. Anzi. Za intal 1474 la Republiche *Serenissima* di Vignesie e à delineât, cun grande plenece e previdence, il concet, i contignûts e lis motivazions: "A son in cheste citât oms di grant inzen, bogns di inventâ e discuvierzi artificis varis e inzeznôs. E si varès di viodi che i lavôrs e i artificis di lôr inventâts no

puedin jessi contrafats di altris che ju àn viodûts cence che si fasi lôr onôr. Par chest il Consei al deliberrà che cualsisedi al fasedi in cheste citât, nol impuarte cuâl imprest gnûf e inzeznôs ma fabricât inte nestre citât, intal moment che al sarà perfezionât, in mût tâl di podê jessi doprât, lu varà di regjistrâ al ufici dal Proveditôr dal Comun. Si fâs inibizion a cualsisedi altri, in cualsisedi lûc sot de nestre jurisdizion, di fâ ciert artificis simil a chel, cence vè vût prime il consens dal autôr, chest intal arc di 10 agns. E si che duncje se cualchidun lu fassarà, l'autôr lu podarà citâ devant di cualsisedi tribunâl di cheste citât e dit ufici lu condanarà al paiament di 100 ducâts e ae distruzion dal artificis. Si da libertât al nestri Gu-

vier di cjapâ e doprâ l'artifici a so plasiment cu la cundizion che nisun altri che no l'autôr lu puedi doprâ".

Il brevet al è duncje un dirit, garantît dal Stât, par un ciert periodi di timp, che al sigure al titulâr la pussibilitât di produci o vendi un ciert ben o di fâ un ciert procediment in esclusive. I dirits leâts al brevet a puedin jessi cedûts traviers contrats scrits a front dal paiament di un presit concuardât tra lis parts.

A son varis gjenars di brevet: chei riferibii a un prodot, (il prin al va indaûr al 1594: Galileo Galilei al à brevetât un gnûf aparât di irigazion), chei riferibii a un procès produtif (procediment di ricetrasmisione cence fii) o ancje a une varietât

vegjetâl (il kiwi zâl "Soreli" de Universitât di Udin).

Il vantaç par une imprese al è di fâ prodots diviers a pet di chei dai concorints (esempli un telefonut plui lizêr) o di ridusi i coscj di produzion (sbassant i timps di lavorazion) rivant a jessi plui competitive sul marcjât.

**MANUELA CROATTO**  
Responsabile Relazioni esterne  
Università del Friuli

PAGINE REALIZADE IN COLABORAZION CU LA UNIVERSITÂT DAL FRIÛL